
COMUNICÂT STAMPE

**TAULE TARONDE AL "MESSAGGERO VENETO"
CUN I PARLAMENTÂRS DAL FRIÛL VIGNESIE JULIE**

**FURLAN, ISTITUZIONI E POLITICHE INSIEMIT
PAR VÊ PLUI TUTELE DAL GUVIER**

Udin, ai 6 di Novembar 2012 - Deputâts e senatôrs dal Friûl Vignesie Julie a son clamâts a fâsi adun al fin di cjatâ un percors par fâ cuintri aes ultimis iniziativis dal Guvier che, di fat, a riscjin di sbassâ il nivel de tutele de lenghe furlane.

L'invît al è de ARLeF, Agenzie regionâl pe lenghe furlane, che al à cjatât daurman la disponibilitât dal *Messaggero Veneto*. L'incuintri si davuelzarà di fat in une taule taronde moderade dal diretôr dal cuotidian, Omar Monestier, vinars ai 9 di Novembar, aes 11.30, te sede de redazion in viâl Palmanova.

Chest invît ai parlamentârs de region al rive cualchi setemane daspò dal incuintri convocât de ARLeF indulà che si son dadis adun dutis lis principâls istituzioni impegnadis pe tutele e difusion dal furlan tant che la Universitât, la Provincie e la Arcidiocesi di Udin, il Comitât 482, il Comitât pe autonomie e il rilanz dal Friûl, la Societât Filologjiche Furlane e i ents ricognossûts di primarie impuartance.

Ducj a ritegnin indispensabil inviâ un percors cui parlamentârs al fin di rivâ a otignî dal Guvier talian sedi la salvaguardie di dirits acuisîts des minorancis sedi la aplicazion des normis di tutele fin cumò no ancjemò adimplen consideradis.

